

Pɔɔl gbouŋ nba pukin ŋanlee ki u din sɔb ki tur **TIMOTI** nae na

Ki jiin 2 Timoti gbouŋ na po

Pɔɔl gbouŋ nba pukin ŋanlee ki u din sɔb ki tur Timoti na din mantik tee kpaaniie ki teenɔ, ki u tee u toontunnanlɔɔ nba tee bik, ki bia tee u sommtɔɔ. Li baryur jiin gbankur poe. U teen Timoti kpaanii nan kpaŋ-n-mɔŋ a wuu mɔɔntir Masia po, kii dia barmɔnii wannu nba tee barŋanii na, nan Yennu gbounkperuk ni maan na, ki bia tun u toonn nan waa set tee wantɔɔ nan barŋanii mɔɔnt-tɔɔ na, kii di biak.

¹ Min Pɔɔl, wunba teen Yiisa Masia toonii, Yennu loomm paak, a n mɔɔnt manfoor nba ki Yennu din lor turit Yiisa Masia paak na, ² n sɔbin gbouŋ na ki teen n bilonkak Timoti. Ti Baa Yennu nan ti Yomdaano Yiisa Masia lomm nan ninbatinu nan parmaasir-ii be nana.

Ki jiin niipoturu nan kpaanii po

³ Yennu nba ki n jiantiro nan dudukŋant, nan n yeejamm nba din tuun bianŋinba na, mi-i meio, n tian a po yoo kura n miaru maŋ ni, nyioƙ nan yonnu ni, ki teenɔ niipoouk a paak. ⁴ N tian a ninnyuut po, ki lek loon ki n la-a kii mɔk parpeenn bonchiann. ⁵ N tian faa teen Yiisa Masia yada nan barmɔnii bianŋinba; ki a yaa Lowis nan a naa Yunis mun poŋ din teenɔ

yadawa. N ki mək birsuk, a mun bia teeno yadawa. ⁶ Li paak ki n tiana maa fan fiin piinii nba ki Yennu tura yoo nba ki n din yii n nii a paak na, ⁷ kimaan Seyeen nba ki Yennu turit na ki teenit janmaandamm kaa, naan Seyeen man teent paŋ nan lomm, nan dia-n-moŋ binbene.

⁸ Li paak, ii moontir ti Yomdaano labaar na ki daa tiin fei. A bia daa tiin fei nan maa be dansarik ni u paak na, naan sak biakdinu u barŋanii man paak, nan Yennu nba tura paŋ bianinba na. ⁹ Noo Yennu-e tinnit ki yiinit a tii tee popeendamm. Waa yiinit bianinba, li ki tee ti toonjana paak kaa, naan u moŋe din senn a u saa tint ninbaauk, Yiisa Masia paak. U din senn nnae yoo nba ki u daa ki nan durinya na. ¹⁰ Naan ti Tinntoo Yiisa Masia-e baar ki fiit wannit li po. Noo Yiisa Masia din biir kuun paŋ, naan bia wannit a ti-i sak u barŋanii man, ti saa la manfoor nba kaa gbennu.

¹¹ Yennu poŋ din yiinin a n teen toonii nan wantoo ki moont barŋanii mane. ¹² Li paake ki n di biak naan ki tiin fei, kimaan n mi maa jii n moŋ ki teen wunba nuu ni, n mi ki birsuk kaa nan u saa fit dia linba ki u jii teen n nuu ni na fanu məkmoək nan joontu Daar na ni. ¹³ Ii dia maa din wanna barŋanii sonu nba na fanu, kii waa-r nan yada nan lomm nba ki Yiisa Masia teent na. ¹⁴ Yennu Seyeen paŋ nba be ti ni na paak, ii dia barŋanii nba ki u jii teen a nuu ni na.

¹⁵ A poŋ mi nan soo kur nba be Asia yent ni na nyikima; bi siabe tee Fijelus nan Hemojenes. ¹⁶ Ti Yomdaano n tin Onesiforus naateeb ninbaauk,

kimaan u daan yoo cheen n par, ki ki tin fei nan maa be dansarik ni na. ¹⁷ Waa daan tan baar Rom doo ni yoo nba, ki u piin loon maa be siaminba nan waa tan la n boor. ¹⁸ Ti Yomdaano n tino ninbaauk joontu Daar man ni. A moŋ mi fanu waa din sommin bonchiann bianjinba, Efesus doo ni.

2

Ki jiin Yiisa Masia lanjinjano po

¹ N bik, fin nanimin chee a par Yiisa Masia nba somma bianjinba, u ninbatinu ni na paak. ² Faa poŋ din gbat wannu nba n peŋ, niib bonchiann numm ni na, a jiir ki wann nisiab nba tee yadadam, binba saa fit wann leeb mun.

³ A sak di biak nanin, faa tee Yiisa Masia lanjinjano na. ⁴ Lanjima nba loon u saako numm n gboou, u ji ki nmat u binbeŋ nan linba ki tee lanjimanba toona. ⁵ Wunba tiin poot nantaar kan fit nyann ki gaar li nyoot, see ki u sak wei li sennu kur. ⁶ Li kpa a talas ki kpaaro nba tun nan ninmonn n sint gaar jeet na tor. ⁷ Ii dukii linba ki n beera na po, kimaan ti Yomdaano saa te ki fan fit bann li kura paak.

⁸ Ii tian Yiisa Masia po, wunba tee Defid yaaboonn, ki din fiir kuun ni, nan maa moontir barnjanii na ki teen niib bianjinba na. ⁹ Barnjanii man paak, ki n be nan jarit ki di biak, nan n tee toonbiitdaano na; Yennu barii man narin ki be nan jarit kaa. ¹⁰ Naan Yennu nigannkab na paak ki n lek di sukuru biak kur ni, a bin mun la tinnu Yiisa Masia paak, kii mok parpeenn nba kaa gbennu na. ¹¹ Barii na tee mamomme a:

“Ti-i kpo nana,
ti mun tan sii mək manfoor nanae.

¹² Ti-i njanmit yabii, ti mun tan saa di naan
nanae;

njan ti-i yaa ti ki miu, u mun tan sii yaa u ki miti.

¹³ Ti-i kii mək yada, njan nɔɔ tee barmɔnii
daanae,

kimaan u kan mi nɔi u mɔɲ binbeni.”

Ki jii toontunno nba pent Yennu par po

¹⁴ A tiar a niib linba na, ki turib kpaanii Yennu
boor, a bi daa kɔn mɔbona paaki; njan ki mək
nyɔɔt, njan li biir binba gbiin nae. ¹⁵ Yabit a mɔɲ
paak ki Yennu n paka, kii tee toontunno nba dia
barmɔnii mɔmaan ki want niib fanu, ki tan daa
di fei u toona ni. ¹⁶ A nyinn a mɔɲ labafaanu nba
ki tee Yennu yar ki bia ki mək nyɔɔt, ki saa te ki
niib n fɔkit nan Yennu na ni. ¹⁷ Li wann-booru
tee nan fiɔk nba tuu di gbanant nae. Haimeneus
nan Filetus daan want li wann boorue. ¹⁸ Bi ki
want niib barmɔnii labaar, njan tuni siab yada
ki yaa kuun fiiru yoo na poɲ baar gara; ¹⁹ njan
Yennu mɔmaan na njan see-e chib nan fiakir
nba kan mi damm na; ki mɔbona nba sɔb li paak
tee nnae a: “Ti Yomdaano mi binba tee u yab.”
Li bia sɔb a, “Wunba kur yet a u tee ti Yomdaano
yɔɔe, li kpaal talas ki wun nyik toonbiit tumu.”

²⁰ Njanbooru boorue be nasaakak ni; kutsɔnt
kuukɔɔ kaa be li ni, siab tee njanii, ki siab
mun tee yɔk. Ki li siab nyɔɔt yab bonchiann, ki
siab nyɔɔt ki yabi. ²¹ Wunba-i nyik toonbiit ki
tee popeendaano, u sii tee nan njan nba mək
nyɔɔt ti Yomdaano boor, ki jan nana, ki teen siir
a wun tun toonjana kura nae. ²² Nyint a mɔɲ

nipaaun nianbiiuk na ni, ñaan kot ki fin nan binba para yeen ki bi yi ti Yomdaano ki loon sommir na n wei yentinu sɔnu, nan yada sɔnu, nan lomm sɔnu, nan parmaasir sɔnu. ²³ A nyik jatii nan liinsin mɔniat. A poŋ mi nan li joontir nan kunkɔnae. ²⁴ Li ki ñan ki ti Yomdaano toontunno-ii kɔn nan niibi. Li ñan ki wuu tee burchimɔe sɔɔ kur boor, kii tee wantɔŋano nba mɔk sukuru, ²⁵ kii tee wunba be soon nna kii kpaan binba nɔi nana na, li pasiar Yennu n tan turib yaak ki bin nyik bi dudukbiit maŋ ki bann barmonii wannu, ²⁶ ki la yan ki lɔkit Sintaanii barit, ki sak ŋɔɔ Yennu loomm.

3

Ki jiin dajoontii po

¹ Ii mi nan tingboun na dajoontii yoo tan sii paar. ² Niib tan sii tee jawudamme, nan liklonbiiuk damm, nan karinbaandamm, nan want-nmɔŋ damm, nan binba sukii niib, nan binba ki saak bi damm mɔi, nan binba ki tian ñamm po, nan binba ki tiin Yennu. ³ Bi tan kii mɔk lomm nan niibi. Bi tan sii tee mɔlanfikdamme, ki kan soor bi mɔŋi, ki sii tee kpikpiruk damm; ki naan bonsusoot; bi tan kii loon toonɔnae, ⁴ bi tan sii nyi leeb poae, ki tee kaatkaat damm, ki dont bi mɔŋ; bi tan sii loon linba mamme ki gar Yennu, ⁵ bi tan sii dia Yenjiantu sanne, ñaan ki saak Yennu paŋ. Nyint a mɔŋ li nibooru ni. ⁶ Bi siabe lin ki doi ñei ki kpann ki nyant pooliinii nba tuun toonbiit bonchiann ki waa bi para nianbiit booru booru na. ⁷ Yoo kura, li poob tumiie ñaan kan

mi bann barmōnii sōnu. ⁸ Janes nan Jamberes nba din ki sak nan Moses bianjinba na, li jabooru mun tee nnae, bi kōn nan barmōniie, bi dudukit ki ḡani, bi bia ki waa yada sōnu; ⁹ ḡaan bi kan fit kpānn niib ki yukiri, kimaan sōo kur tan saa la bi jatii nba tee bianjinba, nan baa din la Janes nan Jamberes jatii bianjinba na.

Kpaanjoontii

¹⁰ ḡaan fin ḡarin poḡ wei n wannu, nan n binbeḡ, nan n dudukita. A poḡ mi maa teen Masia yada bianjinba, nan n sukuru, nan n lomm nan niib, nan n ḡbankur; ¹¹ nan niib nba mukisin bianjinba, nan n biakdinu ni. A mi linba kur tumin Antiok, nan Ikonium nan Listra doi ni. A mi maa din la mukisubiit bianjinba; ḡaan ti Yomdaanōe nyinnin li kur ni. ¹² Barmōniie, niib saa mukis wunba kur tee Yiisa Masia yōo ki loon wuu tee yentinnō na; ¹³ ki nibiit nan kpinkpānnii damm lek tan sii ḡammit pukii bi toonbiit, ki kpānn leeb, ki bi leeb mun saa kpānnib. ¹⁴ ḡaan fin ḡarin, ii dia barii nba ki a tumii ki teenir yada na, kimaan a poḡ mi nan binba din tee a wannteeb na tee barmōnii damme; ¹⁵ ki a bisin niwa, a poḡ mi Yennu ḡbouḡ nba fit teena yan, ki wanta faa saa teen Yiisa Masia yada ki tinn bianjinba. ¹⁶ Maan nba kur be Yennu ḡbouḡ ni na nyii u mōb nie, ki li kur mōk nyōote, ki wantit u po, ki kpaanit, ki ḡammit ti benu, ki wantit yentinu sōnu, ¹⁷ a Yennu toontunno binbeḡ-ii ḡan, ki wun teen siir kii tuun toonḡanbooru kur.

4

¹ Yiisa Masia nba tan saa jen ki di naan ki bu footib nan kpeemm buut na, nɔɔ nan Yennu toonne ki n beera, ² a fii mɔontir u barii; ki yoo-i lekii jan̄ koo li-i kii jan̄i, fin-ii mɔontir, kii piak niib bi toonbiit po, kii kpaanib, kii kɔontib para, kii wantib barii man̄ nan sukuru yoo kura, ³ kimaan yoo baat ki niib ji tan kii gbiin wannjanu, njan tan sii waa bi mɔn̄ nianbiite, ki gbiin wanteeb bonchiann nba sii wantib baa loon bii gbia linba. ⁴ Bi kan gbiint barmonii man̄i, njan loon bii gbiin labagana. ⁵ Njan fin-ii tee subindaano yoo kur, kii saak biakdinu, kii mɔontir Yiisa Masia barnanii, kii tuun toona kur nba ki Yennu tura na.

⁶ Kimaan min njan, yoo baar nan man lu n miara; yoo baar nan man nyi tingbouj na niwa. ⁷ N gbaa gbigbaananna; ki tun n toonn gbenna; n lek dia yada labaar na. ⁸ Li paak, nyoot nba tee yentinu nyoot doo guun sanpaapo; ki ti Yomdaano, wunba bu niib buut nan barmonii na tan saa turin nyoot man̄, buut daar. U tan kan tur min kuukoo kaa, njan u tan saa tur binba kur mun loon wun jen nae.

Majoontik

⁹ Yabit ki baar n pej yian yian na. Kreskens saan Galasia-wa, ki Taitus mun saan Dalmasia-wa, ¹⁰ Demas mantik loon tingbouj na bona bonchiann, li paak u nyikin ki mun saan Tesalonika-wa. ¹¹ Luk kuukooe ji be nanin. Jiin Mak baar nana na, kimaan u toona mok nyoot ki turin bonchiann. ¹² N tun Tikikus ki u saan Efesus-a. ¹³ Fi-i baat yoo nba, fan jii n liatir nba

ki n daan nyik Trowas, ki li be Kapus boor na; a bia jii n gbanpɔɔbir nan n kadagbant na.

¹⁴ Aleksander, wunba kur saauk na din tumin linba bi bonchiann; Yennu saa dat u tubir, waa tun linba na paak. ¹⁵ Ii mi a mɔŋ nanɔ, kimaan u kɔn nant, barnanii nba ki ti mɔɔntir na paak bonchiann.

¹⁶ Maa daan piin n mɔŋ paak kɔnn na, sɔɔ ki set n poorpo; bi kur daan nyikimi. Yennu daa teemm biit li paaki. ¹⁷ Naan ti Yomdaanɔ daan be nanin, ki turin paŋ, ki n fit mɔn barnanii maŋ kur ki tur binba ki tee Juu teeb na kura, a bin gbat. Nɔɔe daan nyinnin kuun ni. ¹⁸ Nɔɔe bia saa nyinnin bonbiir kur ni, ki kɔɔnin u naan nba be sanpaapo na ni nan laafia. Nɔɔe yen dontir mɔkmɔk nan mɔkmɔk. Mamɔmm.

Foontjoontii

¹⁹ N jikit n foontii ki teen Prisila nan Akuila, nan Onesiforus ŋaateeb. ²⁰ Erastus daan biar Korint-a. Trofimus daan kaa laafia, ki n nyikɔ Miletus. ²¹ Yabit ki baar nnawa ki tinkook n do. Yubulus nan Pudens nan Linus nan Klodia teena bi foontii; ki Masiaweira kura bia foonta. ²² Ti Yomdaanɔ-ii be nana. Yennu ninkpabaun-ii be nani.

Yennu Gbouj Moor
Bimoba: Yennu Gbouj Moor Bible

copyright © 2003 Wycliffe Bible Translators, Inc.

Language: Bimoba

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 21 Feb 2024 from source
files dated 29 Jan 2022

00d89ba0-4677-52d9-9bc5-aa3d7c5c966d